

# Gion Deplazes – in um instancabel

■ **(Ir) Differentas personalitads rumantschas s'han engaschadas da maniera impressiunanta sin plirs champs. Ma be pacs èn stads uschè activs e productivs sco Gion Deplazes che ha pudì festivar dacurt ses 95avel anniversari.**

## Ina vita bullada dal rumantsch

Naschì ils 22 da mars dal 1918 a Surrein ha el frequentà las scolas che èn tipicas per persunas passiunadas da lingua: seminari da scolasts e lura studis universitars. Durant il studi ha el dà scola sco magister primar e secundar. Cun il diplom da magister da scola media en giaglioffa ha el instruì durant passa quatter decennis al seminari da scolasts ed a la scola chantunala, nua che el ha surpiglià anc la carica da conrectur. Daspera ha el dà lecziuns da lingua e litteratura rumantscha ad universitads e scolas autas. Plinavant ha *Gion Deplazes* fatg da redactor e presidià pliras uniuns. A medem temp ha el scrit in'atgna ovra voluminusa che è vegnida edida adina puspè e finalmain, dal 1994, en ina furma cumpletta che cumpiglia 12 toms. Ad el steva a cor la tematica da l'identitad dals Rumantschs. Da tgirar e rinforzar questa ha el resguardà sco incumbensa essenziala.

## Funtaunas – ovra-clav

Ina da las ovras che vala aur e che è gartegiada be grazia a l'engaschament in-

stancabel dal giubilar èn ils quatter toms da «Funtaunas». Per incumbensa da la Lia Rumantscha, da la quala el ha fatg part sco suprastant, ha Gion Deplazes scrit la «Istorgia da la litteratura rumantscha per scola e pievel». Quest'ovra, che

cumenza tar ils origins cun las perditgas dal temp da crap e terminescha cun la litteratura contemporana enturn il 1990, è la basa per l'instrucziun da litteratura en la scola media. Ella è er il cudesch da referiment che figurescha en la biblioteca

da mintga amatur da litteratura rumantscha.

La Rumantschia po be exprimer al giubilar in sincer «Che Dieu ta paja» ed al gavischar tut il bun per sia saira da vita.



**Il secretari general da la Lia Rumantscha, Urs Cadruvi, gratulescha a Gion Deplazes per ses anniversari.** MAD